

Dia 21 di maart na Biblioteca Nacional

Celebra di Dia Internacional di Poesia lo tin un toke multi disciplinario



ORANJESTAD – E lingüista y promotor cultural sr. Mirto Lacle conhuntamente cu directora di Biblioteca Nacional, sra. Astrid Britten a anuncia un actividad cu lo tuma luga dia 21 di maart pa 7'or anochi relaciona cu Dia Internacional di Poesia.

Actualmente sr. Lacle a bay atende un evento na Guainabo (Puerto Rico) relaciona cu e apertura di e Museo di Salsa mas grandi di mundo. Prome cu el a biaha a sostene un entrevista cu Bon Dia Aruba riba e anochi aki, caminda nan lo tin un programa multi disciplinario dedica na celebracion di Dia Internacional di Poesia na Biblioteca Nacional Aruba.

Dia di Poesia

E ta un actividad cultural realisa conhuntamente cu Biblioteca Nacional Aruba, Instituto Pedagógico Arubano, Departamento di Cultura Aruba y organizado Mirto Lacle ta invita pueblo di Aruba en general, autor- y poetanan pa ta presente pa celebra e dia tan importante aki.

E fecha aki ta trata cu tur compositor y autor di composicion poetico, sea cu a publica of no, ta cordialmente invita pa cele-

bra e dia aki na Biblioteca Nacional su sede na Oranjestad. E anochi ey nan ta bay dedica na un persona cu a haci hopi pa nos pais culturalmente. Ta trata di sra. Maybelline Arends-Croes kende a forma parti di e comision cu 40 aña pasa a haci cu e composicion poetico a bira Himno nacional di pais Aruba.

Aunke sra. Arends-Croes a ricibi diferente homenahe e biaha aki, nan kier duna e honor di dune un reconocimiento den cuadro di e conmemoracion di 40 aña di Himno y Bandera y 30 aña di Status Aparte. E ta un persona musical cu incansablemente a traha pa hubentud y promove canticanan na Papiamentu. “Semper el a sali pa salvaguardia esaki”, sr. Lacle a bisa.

E dia ey lo tin otro grupo cu ta Rondalla Universo di Aruba bou direccion di sr. Frank Croes. E ta un grupo di un trayectorio grandi di 14 guitarrista y cantante. Nan ta bay deleita cu algun presentacion di coro di canto bou guia di Maybelline Arends-Croes. Lo tin declamacion di poesia cu e.o. Anaïsa Orman y baile di grupo Gucci-dancers di grupo di teatro di Departamento di Cultura Aruba.

“E anochi aki lo bira uno di declamacion, presentacion di buki, canto, musica, etc...” asina sr. Lacle a declara na Bon Dia Aruba. Como atraccion special lo tin presentacion di un autor di Corsou, Roselyn Jessurun, kende lo duna un show cu poesia ritmico y poesia canta. Tambe Roselyn Jessurun lo presenta su obra literario Pais Ankrá.

Roselyn Jobse Jessurun

Roselyn Jobse Jessurun a nace na 1959 na Corsou caminda e ta biba y traha como Register Accountant. El a finalisa e estudionan di Docente Economische Wetenschappen I en

Recht, Economische Wetenschappen II en Recht y a doctora den e estudio di Economia Empresarial (Bedrijfseconomie) na Hulanda.

Roselyn ta autor, productor, compositor y declamado. E ta trece mensahe mediante poesia y musica. E ta toca guitarra, piano, conga y bongo y e mes ta compaña su poemanan di forma ritmico. Roselyn ta amante di cifra, e ta gusta analisa, duna conseho y aporta pa su prohimo. Den tur loke e haci e ta busca perfeccion.

For di mucha Roselyn a presenta na radio, television y riba tarima cu su mama y su

rumannan. Henter famia Jessurun a presenta e esena di ‘do, re, mi’ den e obra musical ‘The Sound of Music’, produci pa ‘de Xaverianen’. Roselyn a skirbi y presenta su poema-, sketch- y composicionnan na Hulanda y Corsou.

E ta autor y productor di e obra musical ‘Een wervelende tropische verrassing’, presenta den teatro na Tilburg, na 1988. Minifalchi ta e macutu di poesia cu Roselyn a publica riba peticion di su publico na Hulanda, caminda el a presenta e so y compaña pa su grupo Solamar. Na Den Haag e tabatin e honor di declama y compaña na bongo pa Julian Coco. □